

SCAMMER ATAU PENIPUAN
12 SAFAR 1444H / 9 SEPTEMBER 2022

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ
أَعْمَالِنَا مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ.
أَمَّا بَعْدُ،
فِيَا عِبَادَ اللَّهِ، اتَّقُوا اللَّهَ، أُوصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama meningkatkan ketakwaan kepada Allah Subhanahu wa-Ta'ala dengan melaksanakan segala perintah dan meninggalkan segala larangan-Nya. Mudah mudahan kita diberkati dan dirahmati Allah Subhanahu wa-Ta'ala di dunia dan akhirat.

Sidang Jumaat yang dirahmati Allah Subhanahu wa-Ta'ala

Khutbah Jumaat pada hari ini memperingatkan sidang jemaah sekalian agar berhati-hati dengan ancaman penipuan atau scammer dalam talian. Kelicikan penipuan kewangan atau *scammer* dalam talian semakin menjadi-jadi di Malaysia. Walaupun banyak tangkapan yang telah dibuat, namun kes penipuan begini masih lagi berlaku dengan kerugian yang ditanggung mangsa dengan jumlah kewangan yang begitu besar.

Secara umumnya Polis Diraja Malaysia (PDRM) telah mengelaskan jenayah penipuan kewangan dalam talian ini kepada lima jenis iaitu; (i) penipuan atau pinjaman yang tidak wujud; (ii) e-dagang; (iii) *Macau Scam*; (iv) *Love Scam*; dan (v) tipu SMS. Penipuan ini juga tidak mengenal mangsa mereka sama ada individu profesional, kelas menengah mahupun warga tua.

Ketika negara dilanda musibah Covid-19, operasi penipuan sebegini kerap berlaku. Menurut laporan PDRM dalam akhbar Berita Harian bertarikh 10 Mac 2022, sebanyak 98,607 kes penipuan dalam talian dengan kerugian dianggarkan bernilai RM3.3 bilion dilaporkan di seluruh negara bagi tempoh tahun 2017 hingga 2021.

Teknik-teknik penipuan yang digunakan dalam kegiatan jenayah dalam talian ini termasuklah membuat panggilan dengan menyamar sebagai anggota penguatkuasa atau penjawat awam agensi tertentu, memperdaya untuk mendapatkan data peribadi dan mengguna atau mewujudkan laman sesawang palsu dan lain-lain.

Taktik-taktik keji penipuan kewangan telah menyebabkan mangsa menanggung kerugian yang besar dan mangsa hilang wang simpanan sepanjang hayat.

Pelaku yang melakukan kegiatan jenayah kewangan ini disifatkan sebagai zalim kerana memanipulasi orang lain dan tidak mempedulikan soal haram dan halal. Sedangkan mangsa teraniaya dengan kehilangan wang ringgit yang telah dikumpulkannya sepanjang hayatnya.

Allah Subhanahu wa-Ta'ala melarang perbuatan memakan harta orang lain secara batil. Firman Allah Subhanahu wa-Ta'ala dalam surah al-Nisa' ayat 29;

أَعُوذُ بِاللَّهِ مِنَ الشَّيْطَانِ الرَّجِيمِ
يَا أَيُّهَا الَّذِينَ ءَامَنُوا لَا تَأْكُلُوا أَمْوَالَكُمْ بَيْنَكُمْ بِالْبَاطِلِ

Yang bermaksud; *“Wahai orang yang beriman, janganlah kamu makan harta-harta sesama kamu dengan jalan yang batil (tipu, judi dan sebagainya)...”*

Sidang Jumaat yang dirahmati Allah Subhanahu wa-Ta'ala

Janganlah kita terlibat dalam penipuan untuk mencari rezeki. Apatah lagi bersubahat dalam mendalangi kegiatan jenayah kewangan dalam talian ini kerana sifat tamak dan bermegah dengan kekayaan secara haram.

Bagi mengelakkan diri menjadi mangsa jenayah kewangan dalam talian seperti ini, kita hendaklah sentiasa berwaspada dan jangan menjawab panggilan daripada orang yang tidak dikenali dan mencurigakan.

Hukuman yang dikenakan juga seharusnya lebih tegas dan menakutkan orang ramai supaya tidak melakukan jenayah tersebut. Masyarakat perlu lebih peka dengan perkembangan semasa berkaitan jenayah kewangan ini, supaya tidak mudah tertipu. Hendaklah sentiasa mendapatkan nasihat dari pihak berkuasa supaya selamat daripada penipuan ini.

أَعُوذُ بِاللَّهِ مِنَ الشَّيْطَانِ الرَّجِيمِ

يَتَأَيُّهَا الَّذِينَ ءَامَنُوا إِن جَاءَكُمْ فَاسِقٌ بِنَبَأٍ فَتَبَيَّنُوا أَن تُصِيبُوا قَوْمًا

بِجَهْلَةٍ فَتُصِيبُكُمْ عَلَىٰ مَا فَعَلْتُمْ نَادِمِينَ ﴿٦﴾

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ
الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ، أَقُولُ قَوْلِي هَذَا
وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ
وَالْمُؤْمِنَاتِ، فَاسْتَغْفِرُوهُ فَيَا فَوْزَ الْمُسْتَغْفِرِينَ وَيَا نَجَاةَ التَّائِبِينَ.